



白鹿山房詩集卷九

桐城方中發有懷著

七言律

癸亥元旦坐雪退一步示孺姪

紙窗書幌密垂垂。雪滿苔階坐不知。隨俗辛盤初
散後。如期亥瘧未來時。團龍茶熟橙香亂。睡鴨爐
溫硯凍遲。莫道此閒非福地。九州何處不瘡痍。

是日

值予瘧期

穀雨渡江赴九華之約卽事呈喻太守三首
春潮滿滿釣船輕。恰遇今年第一晴。鏡面江平風

絕響魚鱗雲散日初生。山開夾岸垂天合。郡割中
洲畫地清。此渡由來稱最險。安流穩挂片帆行。
堤楊遶郭碧重重。塔影橫江臥老龍。溪口幾家晴
曬網。湖心孤寺午聞鐘。講堂人滿傳經學。米市船
多免吏封。野客到來無別意。杖頭乞與九芙蓉。
天臺直在萬峰尖。拄杖穿雲上不厭。暇日圓緣及
山水。多年恩澤飽閭閻。烟雲畫障隨身辦。花月吟
囊逐手添。却笑賞心無限事。一時將去恐傷廉。

既至池陽諸公已先往半道逢范西漢蔣素

書歸

自在孤筇落後遊。林巒仔細看。從頭邨分族。住人
烟密。地占山多古木稠。一色燒空迷躑躅。數聲隔
葉弄鉤輓。匆匆笑問歸來客。幾處曾將勝槩收。

雨中登九華

風雨瀟瀟石磴懸。籃輿咿軋任盤旋。千峰霧氣埋
成海。百道泉聲踏上天。佛號傳呼香客拜。燈龕深
坐老僧禪。蒼茫不辨來時路。指點仙橋何處邊。

由化城寺禮地藏塔

勝境梯航動九州。我來頂禮竟何求。六時梵唄凌
雲響。四面香烟擁塔浮。院院題名招客駐。層層架

閣引仙遊。化城常日封陰靄。難得清明到上頭。

東巖

逕繞龍池百折行。懸厓老樹倒垂生。奇峰誰擘開
天手。飛瀑長喧太古聲。下界樓臺晴可數。半空鐘
磬晚來清。何年鎖却堆雲洞。虛坐松窗待月明。

天臺

由地藏塔直上二
十里為九華絕頂

九十九峰青奈何。到來一一頂堪摩。山連宣歙排
雲去。江瀉荆吳裂地過。頃刻陰晴天不定。長年春
夏日無多。清都只在人間世。輸與孤僧老薜蘿。

六泉道中回望九華

回首烟嵐著處迷。重來應不解東西。天開半壁雲
峰峻。野濶千邨夕照低。繡地閒花排日放。織林嬌
鳥趁晴唳。多情獨有龍池水。一路相隨下五溪。

自九華返池陽喜晤喻太守時奉檄走姑孰

宛陵還署即日又有皖行賦此論別二首

下弦纔到上弦日。楚尾吳頭路一千。笑殺黃塵埋
俗吏。那知清夢引遊仙。敬亭山頂雲隨馬。采石江
心月趁船。不是前身兼謝李。何因結得數州緣。

又排車馬向江干。鈴閣淹留半日難。堆案簿書流
水決。到門詩畫掌燈看。春辭秋浦客將去。草滿齊

山興欲闌好待使君閒點染柳亭松磴細盤桓

口號奉唁叔兄

時張嫂新逝侍姬免身又得一女旋天

茫昧憑誰問鬼神強將溫語慰酸辛影分鸞鏡纔
經月夢破蘭香又一塵掌上衰麻嗁弱女階前苴
杖拜何人亦知身世悲無極忍淚還須爲老親

次韻和學圃舅氏春山八咏

嶺上雲

飄飄共仰絕塵姿藹藹還憐出岫遲奇在夏峰初
起處歸從春雨乍收時閒情一片誰堪贈變態須
臾靜不知只恐石潭龍欲動垂天陰合冷疎籬

原上邨

小開阡陌枕高原池柳淡淡抱水軒一帶松篁通
嶺路數聲雞犬隔溪門催畊鳥起星初淡散社人
歸月有痕最愛滿邨烟海漲蓬萊島上度朝昏

溪上路

邨北邨南日往回筍鞋漬徧幾層苔雨沈石步尋
常斷灘帶春聲雜還來幽境慣探那用問比鄰常
到不須陪忘機直欲親魚鳥門巷何勞過客猜

石上泉

飛泉百道注潺湲岸圻沙崩改歲年牧遂穩騎黃

白眉山房詩集 卷九
犢過釣竿閒引白鷗前雷驚晴壑無停響月落風
潭不定圓數畝溪田霑漑足山家雨露未憂偏

池上梅

綽約幽花綴古柯冰壺浸徹夜如何拓開閒地成
香國儘放疎枝蘸碧波歲晚繁華甘物外生平淡
泊占春多關心一一誰寒暖倚遍闌干幾曲歌

巖上竹

凌雲勁節獨輸君石逕頻過護惜勤風箨亂時閒
聽雨烟梢溼處動成雲地高黛色參天易林密清
陰比舍分難恠主人嫌遠別平安誰遣日相聞

松上鶴

太液池頭千歲禽褊褊何日到長林凌霄不肖供
人玩擇木唯思息影深天迴樊籠難入夢山空飲
啄渾無心蓬萊仙客知相憶忍戀高枝老碧岑

陌上花

紅紫紛紛照眼明穿林度壑一筇輕天生不藉栽
培力野趣何勞假借名趁蝶喧蜂徒世態軟風細
雨轉多情幽香寂寂無時歇那怕春歸杜宇聲

甲子元旦感題

桃符懶換舊門閭轉憶昇平卜築初土室本爲鉤

黨計花源竟作子孫居
運憐夏祚衰難復寒記堯
年痛未除甲子須臾渾閒事
爛柯碁局更何如先廷

尉公以甲子年卜得同人于野遂歸隱白鹿踰年而黨禍作迨乙酉後先中丞公挈家居此獨余世守至今

送儼若省親入都賦贈五首

曲巷翛然遠市氛
舍南春水到鷗羣
人情舊雨非今雨
世路秋雲復夏雲
錦里有心依僕射
灞亭何事苦將軍
可知流水高山意
不是鍾期不許聞
百戰孤城蹙虎狼
論功似覺勝睢陽
一官報罷平戎日
盡室生還點鬼場
李密因緣空自嘆
王尊賢佞有何常
新篇寫出皆忠孝
每當離騷讀數行

怕聽高歌擊唾壺
春江淡似客愁無
飛飛繞樹驚棲鵲
啞啞唬饑反哺鳥
憑藉知君羞衛霍
遭逢爲我致唐虞
平生志願非溫飽
遮莫迂疎笑腐儒
戚里歌鐘日夜新
爛書軒裏滿牀塵
五陵裘馬非無侶
三徑蓬蒿別有人
土銚茶烟烹老雪
紙窗梅影貯閒春
如何韋杜城南地
白眼還容傲賤貧
惆悵書來報遠行
新醅盎盎與誰傾
幾行弱柳折難盡
無數好花看不成
畫閣春風閒燕乳
旗亭夜雨夢鶉聲
江南櫻筍浮家慣
轉怯鄉關是帝京

流寓皖城已久曾與予訂看花之約

學圃舅氏招集賜金園因隨入山信宿卽事

四首

夢想龍眠到苦遲招攜特爲緩歸期將車僕解溪
淡淺授杖童諳路險夷懷抱宛然逃世客光陰強
半住山時千巖萬壑誰能徧指點林巒一一知
數里烟邨縱往還最無厭足是看山露團莎徑朝
常踏月浸松門夜不關儲酒預防溪漲阻借書畱
遣雨天閒六時清課無多事先放籠中雙白鷗
筆牀茶竈逐時新不受人閒一點塵林鶴澗猿歸
靜社蒼松翠竹想前身烟霞豈只私高隱圭組何

會累達人六百年來遺勝地知音未算李公麟
信宿幽齋話耦畊但經耳目盡關情過雲峰雜陰
晴色靜夜泉分遠近聲漸喜漁樵忘姓字已教州
府斷逢迎自憐未得逃塵網孤負湖山住一生
次韻和姚畊壺先生春山八咏

燒後草

痛經麋滅尚連根幾日春風又滿原
肯把寸心灰劫火還依歸路引王孫
影霑袍色青常亂香染裙腰綠漸繁
轉盼枯榮信天意欲噓餘燼已無痕

接活樹

奪胎換骨悟通禪殺活同時巧結緣莫歎孤根終
伏地可知新影便參天能無我相神偏王得化生
身夢已圓從此繁華驚勝絕曾經刀鋸轉堪憐

分叢竹

此君價重碧琅玕帶露和烟乞數竿向記舊林天
自定移連宿土地相安乍驚月影空庭亂早送秋
聲滿院寒老去東頭判痛飲風流更製籜皮冠

初插柳

麴塵輕漾水清泠小苑眠多喚不醒烟雨織成絲
縷縷春風翦出影亭亭翠翻冶葉爭眉黛白撲狂

花點鬢星却笑宿根無藉在萍飄梗斷眼偏青

病愈鶴

豈因塌翼中危機偃息聊依黃鵠磯飲啄漸安閒
試舞羽毛初換怯孤飛箭畱蜀寺何年取彈誤蘓
仙識字稀丹頂煉成軒翥易瑤池早晚去還歸

脫鉤魚

過河眼見泣絲緝豈料清波更隱鱗海內忘機餘
此地夢中乞命別無人全軀較勝拋殘鱠遠害還
須畏哆唇莫羨江湖容浩蕩投竿誰不據通津

尋巢燕

飄泊頻年苦異鄉
依依似欲老茅堂
雲封磴戶舖雛穩
花滿春山結壘香
王謝世移人幾換
華胥夢破信難將
巢林巢幕愁多少
恠得銜泥避画梁

放生麀

四野虞羅日見侵
離羣已辨別烟岑
藉令歿去知誰手
何意生還許擇音
聚首淡恩憐子母
收聲決計臥山林
銜芝他日隨仙駕
須上青城絕頂尋

秋日錢枚一孝廉
招飲陟園同黃先民
范西

漢姚綏仲作二首

浮名不遣繫閒身
羅逕苔垣迴出塵
聊託談諧娛

市隱轉因卜築諱
家貧齒殘嬾嚼紅
綾餅髮短偏

宜烏角巾猶苦鵝
鸞多舊侶白鷗連
日避朱輪時張

宗伯舅氏暨汪太史涵齋先後登覽

瓦礫荒城憶昔年
園林次第闢幽偏
精廬人老依香火
吟社風高擬月泉
竹影數竿搖酒浪
花陰一架覆茶烟
小樓不起非無意
滿目江山劇可憐

宅祀

文昌關聖觀音諸像每月大會同人于此地據山頂可以四望入院一無所見

除夕

殘年倍覺白駒馳
浪擲流光與鬢絲
萬事無成生亦歿
百端交集喜偏悲
老偕婦病開懷少
衰望孫

雖得力遲家學漸荒門祚薄擬酬夙願是何時
乙丑元旦戲題

柴門曉起雪皚皚柏葉椒花凍滿杯恰好臘隨年
尾盡難逢春在曆頭開駑材馬齒添何補奢望豚
蹄祝不來牋乞天公無別事清閒便是小蓬萊

是年

元旦
立春

歲朝二日雪後探梅月溪因邀鄰友同酌

杖藜壺榼度溪橋貪趁前邨雪未消光冷平沙秋
踏月眼迷極浦夏乘潮窮陰澗壑森毛髮背日松
筠凍沈寥恠得故人驚我到屠蕪比屋不會邀

學圃舅氏過訪白鹿山莊因窮二龍之勝口

占二首

百里蒲帆問草堂到門應笑逕全荒解衣快就松
風浴移席清露竹露涼話及世榮情轉淡算來幽
事日偏忙品題增我林泉價從此柴荆老不妨
探幽草草徧林巒襪襪連朝興未闌野老何妨爭
席坐山家莫作貴人看巾車曉裊晴嵐溼釣艇風
飄溪雨寒幸有烟霞足供給不嫌麤糲入盤餐

奉陪學圃舅氏登霄漢樓感懷任磁州刺史
十載登臨憶舊遊小酌重問竹間樓鄴侯再乞歸

衡嶽永叔空思老潁州無恙江山憑放眼僅存城郭怕回頭暮雲直北千餘里宦海茫茫一葉舟

舅氏

辛亥假歸磁州招飲此樓 舅氏
還朝後遂有甲寅之亂故及之

夜渡獨山湖

獨客孤舟破夜行湖天淼淼境淒清
火排荒渚蟹爭上霜落寒沙雁自驚
波面月生漂岸影山根風歛剩濤聲
五更水廟疎鐘起夢醒篷窗路幾程

雪中坐便足樓孺姪忽至因留共酌

數椽草閣寄鴻濛人徑初開屐齒中
寒到十分清始絕白唯一色影皆空
梅憨不醒連山凍竹弱難扶
埽地風贏得愁腸暫消遣酒香茶熟火爐紅

戲咏月溪雪獅子

威光四射影清癯開口休輕笑野狐不壞身
從何處證衆生相却本來無浮雲變幻疑蒼狗
短景消磨歎白駒世外尚難除結習天花散著滿微軀

除夕

判作頑民過此生天時人事渾忘情
不嫌曆日山中少頗覺頭顱老去輕
病踰中年如上壽辱唯唾面有餘榮
松盆守歲家家事獨醉邛醪睡到明
丙寅首春李劬菴自楚來訪舊蛟臺奉邀入

山不果卽事感贈三首

裘馬翩翩憶昔年白頭重到話悽然投閒却笑昇
平後快意翻輸仕宦前河嶽千秋存間氣風騷一
代接先賢中原耆舊無多在相對那能惜酒錢
曾指南雲赴戰場也趨北闕獻長楊仲宣樓上人
空老郭隗臺邊跡久荒聊借神仙消骯髒不忘君
父託篇章芒鞋五嶽寧遺世羞課桑麻杜曲傍

劬菴

從軍荆南復薦博學弘詞
皆不得志晚學黃白之術

酒滿行厨榻滿樓招來賓從輒淹留居官日少羞
三窟作客年淡遍九州蹭蹬何人觴海鳥飄零到
處狎沙鷗獨憐花逕緣君掃雨雪春江早放舟

嚴冲太史歸里置酒聚順堂招集同學講舊
好也有不及與則致其子弟會者凡二十
九人屈指曩遊已少其八又強半皆少年
不勝今昔之感然張燈高譙少長盡歡已
二十餘年無此事矣因卽席賦詩以紀其
盛時丙寅二月十七日也

筵開東閣典春衣鄉里虛誇畫錦歸休怕故人疑
矯飾相期同學異輕肥班聯玉筍看重起譜按金
蘭數漸稀三十年來文酒地幾回談笑得忌機

白鹿山房詩集 卷九
金壇蔣度臣過訪山中卽送之大梁

忽漫重逢是遠行寒燈一盞話平生鷗來新水貪
尋侶鶯老荒林倦少聲繚繞山川孤客路纏綿風
雨故人情送君匹馬黃河上只有愁心寄月明

雨阻度臣不得解纜共拈鹽韻五字

滂沱盡日倚風簷貧病生涯苦並兼老屋漏多常
著屐小窗雲冷怯鉤簾溪衝邨逕重重斷潮上湖
田續續滄渰獨喜勾畱有佳客交淡脫粟總無嫌

又拈咸韻五字

三徑蓬蒿滿未艾松關無事不須緘酒緣戶小虛
蕉葉茶爲眠多選石巖莫恠烟雲侵旅榻較勝塵
土泥征衫梁園此去窮舟楫幾日郵程託布帆

又拈江韻五字

平湖萬頃勢連江積雨聲中倒玉缸過節筍搜青
箇箇趁潮魚買白雙雙烟和嵐氣屯朝爨晷短林
陰暗午窗筆陣幸能搖五嶽愁城不藉酒兵降

又拈肴韻五字

烟邨咫尺隔蘄茅策杖無從覓素交泥濺渾埋新
菜甲霧低時放老松梢栖栖燕子愁翻幕啞啞鴉
雛怨落巢却笑苦吟忙不了羈懷別恨似全拋

又拈覃韻五字

山水依依野興酣壯懷肯便老烟嵐別憐黃鵠雙
飛翼情抵桃花千尺潭空谷画牛甘自放畏途捫
蝨莫輕談定知此後相思處夜夜心隨斗柄南

冬客率山寄答吳季六画竹之贈二首

一幅溪籐竹數竿封書特與報平安疎枝傲雪神
猶王勁節凌雲勢未殘阮籍入林同伴少湘妃有
淚幾時乾知君寫寄無他意只爲相期在歲寒
雄心冷落老爲農濁酒難澆磊塊胸豈意殘年看
射虎翻憐絕技學屠龍我衝臘雪來千里君隔寒
雲定幾峰却笑到門還興盡後期何地更重逢

丁卯初夏自里門還山

春光斷送九十日今日籃輿自在行百和野花香
不絕千章邨樹蔭初成分秧水足迎潮雨打麥天
逢入夏晴芳草青山常自好閒身領畧倍多情

秋日同受斯姪過茲園柬姚注若二首

西莊給事特風流次第都將勝地收曲磴下臨官
路口危欄高出女墻頭柳塘新水搖書幌竹圃清
陰落酒筍聞道雙扉終日閉等閒不與俗人遊
平生痼疾是烟霞逢著園林杖定拏凭几峰巒雲

四面捲簾樓閣雨千家
輓轡轉起當堦瀑籬落分
開各院花却訝關心幽事急
軟紅香土忘京華

大龍拜阮一衲道人墓感成四首

猶是蓬蒿舊隱居
逢迎無復似當初
花前露冷催詩酒
竹下風翻引睡書
小院鶯嗁人宛在
空梁燕去月生疎
可憐宿草年年慟
親戚餘悲轉不如
歿定無知定有知
倘能化鶴不勝悲
鼎彝散後消香火
几席空來罷享祠
荒逕絕稀來弔客
壞墻一掃舊題詩
影堂風起鬢眉動
髮髯平生笑語時
劉阮交情歿更親
新詩一字一酸辛
老年無處求

良友佳節常來哭
故人舊種好花除
已盡漸平荒

冢認難真擬鑄片石
題名姓乞傳多時譜
逸民淡莊

哭一衲詩最多予又乞叔兄素北為墓表

十載春山冷薜蘿
招提願力久蹉跎
凄清怕我鄰家
躑躅愁他牧豎歌
身後事原無論矣
眼前人獨奈情何
蹇驢尚記貧交密
每到柴門不肯過

擬改所居為菴祀一衲其中後竟不果

小年茂人齋侍伯母大人飲感呈叔兄因懷

兩兄諸姪

淹留豈惜頌椒花
秉燭圍爐數歲華
為愛承歡淡

白鹿山房詩集 卷九
諱老更貪聚首勝還家門衰憂患何時歇身病詩
書夙願差骨月東西千萬里可能一一夢天涯

除夕

暮景荒涼百感增清平極目見何曾天心老去春
難轉地力窮來歲少登下箸幾人知惜福燒丹是
處想飛昇草茅自笑憂時切坐撥寒爐守一燈

戊辰元旦二首

斗柄東回節物新行年五十聽沈淪憂賢豈待龍
蛇歲憤世何勞蠅蝨臣閒臥松雲甘白首病拋卷
帙負青春孝經跪向先人讀一字空消汗一身

檢曆驚心是戊辰改元回首憶崇禎六龍乍起嘗
陽御尺護爭乘啟蟄伸豈料洛川淪寶鼎可憐涓
水泣金人卽今鶴髮遺民少感舊憑誰問海塵

題謝遠邨行春圖

酒瓢詩卷杖頭懸踏遍天涯四十年名姓竟埋詞
客老乾坤只剩醉鄉偏舊交屠狗人誰在漫應呼
牛我獨憐滿眼兒孫不歸去風光何處勝斜川

第三孫女生五日而殤口號志感

但投懷抱卽天親幻化須臾亦愴神形影渾疑連
日夢家庭空算一生人餘香浴剩蘭湯暖故物開

白屋山房詩集 卷九
憐繡祿新豈爲世情嫌弄瓦金環圖換再來身

待月看芙蓉影和友人作

秋江花發映澄鮮落晚紅妝更可憐翠袖倚來寒
黯黯錦屏暗處露涓涓眼迷霜葉真難寫夢斷池
荷恨莫傳睡去不須銀燭照待他明鏡上青天

送宗人子悟歸壽春二首

酒樓會典鷓鴣裘眼底家園不可求祠廟荒涼新
伏臘墓田零落舊松楸一庭詩禮人初聚十載風
波客再遊暢好春光恣酬酢柳條無賴惹離愁
俠骨稜稜挹後賢中丞事業想當年臺端風節先

朝著遼左霜威異代傳兄弟孤忠同許國疆場勝
算擬回天只今麥秀空餘恨共把遺編一黯然

中丞

公諱震孺先祖戊寅撫楚時中丞擘畫
破賊機宜十餘條書之便面至今猶存

東澗山龔中翰子棟二首

雪鬢丹顏老逸民早從南渡侍楓宸渴霑金掌盤
中露淚灑銅駝陌上塵皂帽半生甘作客青囊一
卷穩藏身尊前莫話遊仙夢曾到蓬萊有幾人
編紵情親三十年萍踪逐處聚江天秣陵耆舊悲
何限邗水笙歌意惘然推命笑逢磨蝎守卜居斷
在拂龜先歲寒倘許長相共百遍題名皖嶽巔

雨中臥病里門感懷二首

紙窗雲冷晝漫漫愁緒無聊引萬端
節令還因當閏改陽春也爲積陰寒
崇逢二豎醫何益讐在三彭守更難
欲弔汨羅人已遠賦成揮淚與誰看
繩牀輾轉寐難成孤館殘燈獨客情
颯颯陰風城柝亂蕭蕭寒雨寺鐘清
誰家薤露歌侵曉何處梨園唱徹明
喚取旁人聽仔細百年哀樂送浮生

雪美人

水晶宮殿瑣飛瓊一片行雲出峽清
柳絮風前吟慘淡梅花月底夢分明
玉樓寒舞霓裳重子夜冬歌白苧輕
莫笑無鹽工刻畫藐姑肌骨本天生

雪僧

撮土搏沙費化工前身自是雪山童
六根但使塵俱淨四大原知色本空
白足共尊看踐履紅爐試點便消融
偶來遊戲清涼界生滅休疑旦暮中

里門夜歸舟行卽事

衰草連天野岸平退潮邨步屋初成
聯翩雁落晴灘響潑刺魚翻夕照明
枕上清霜回客夢帆前殘月度雞聲
披衣忽覺家山近渡口湖乾路可行
姚天池招飲鶴巢同錢鴈湖劉畱菴家叔子

成共拈庚韻

竹影松濤隔世情
簾櫳隱見逕縱橫
庭前種樹經三代
臺上看花盡一城
拄杖到門多父黨
下帷分院出書聲
漫言客醉忘歸去
無數新禽繞舍鳴

水仙

飄然獨立艷非常
紙閣蕭疎映曉霜
性潔不甘塵土澆
體柔偏耐歲寒長
一清如水梅爭瘦
六出爲花雪有香
莫對孤芳惜遲暮
也先百草占春光

己巳除夕

愁腸百結那堪論
昏黑何由叩帝闈
半世劬勞仍

獨子一家涕淚盡
諸孫命窮多壽徒
增苦歲惡蠲

租枉拜恩萬事從
今無復意餘年只
合付空門是年

三孫並歿

除夕哭亡兄素北兼懷伯仲兩兄

鴻雁驚心破陣初
况逢節序痛何如
松楸獨閉長眠宅
梨棗誰刊舊著書
王祭孤兒三尺許
尸饗老母七旬餘
定知海嶠秦關客
有夢今宵慰倚閭

庚午元旦

浮生辦作信天翁
世態紛紛冷眼中
渾樸漸無前父老
謹叟轉憶小兒童
春回隔歲梅偏少
泉涸經

冬雨未通衰朽不辭供唾罵近來得力是癡聾

耳鳴二首

雷聲淵黑杳難知天籟參參怒者誰夢裏飛蟲甍
徹曉牀頭蟻戰罷何時久憎俗事偏相鬧稱作家
翁豈但癡莫笑大聲全不入耳中吾自有咸池
飽聞翎雀淚偷垂天聽高高亦易欺豈有河容巢
父洗更無酒乞社公醫殺機到處聲難辨醉語多
時唾不知恰似魯郊觴海鳥九韶環奏祇增悲

春日同譽子東來兩弟過訪蓮園從祖留飲
有作

把臂論文過草堂謝家羣從狎中郎經書獨愧老
孫子游獵真同大父行風竹影搖碁局動寒梅花
撲酒尊香石麟共算題詩近應笑荒疎寫弄麀

未有嗣息時
侍姬方孕

病中口號

一枕呻吟徹曉聲如絲命在強逢迎耳中孤磬憑
陵響眼底千花歷亂生蠶老妄思還出繭碁殘誰
許便推枰蜉蝣身世初何惜只恨遺書讀不成

秋夜坐崇實會館招友看月

陋巷深藏十笏居紙窗花竹意蕭疎特從耆舊開

吟社重散生徒自讀書萬卷破時天可勝寸心淡
處谷同虛相攜直欲遊塵表雲淨秋空月一梳

嘉平雪後少府王公枉訪草堂即事四首

萬峰晴雪凍難開按部驚傳五馬來歲暮尚勤民
事出星馳還恐去程催自甘洛下人僵臥何意山
陰權未回鷗從到門麾斥盡汀鷗林鹿迴無猜

桐民爭界來勘龍山迂道
見過止宿山齋盡屏從吏

月浸繩牀冷不眠衝寒曉起步山前紛披蓬徑鉤
衣急确犖冰厓蹴屐穿亭可醉翁寧在酒石堪呼
丈未嫌顛經營莫笑人功少敢向邦君乞俸錢

余有

別業南浮山多奇石公破凍披榛歎賞不置小憇
亭子特以荒廢見嘲性不飲酒是日爲進一卮

江山百里恣盤桓尚覺尋幽興未闌凍浦徑馳輕
騎度嚴風直透軟裘寒絕無供張煩郵吏一任逢
迎簡上官借問此來何所得烟雲滿袖壓歸鞍

江行抵樅陽登陸紆迴百餘里供具皆自給不費民間
一錢唯愛子案頭画冊數幀使小吏懷之馬上而去

長年抱病掩松關州府那堪數往還大度易令疎
野近敏才常見簿書閒晴窗画稿江南樹暖閣屏
風郭北山一種宦游偏適趣勞勞却笑滿塵寰

余是

年春會謁公官閣歡
飲竟日茲期再往

除夕

白鹿山房詩集 卷九
檢曆明年五十三何曾夢想更生男
淡憂獨子顏
初解轉憶亡孫痛不堪
薶味乍回同橄欖
燈花齊放比優曇
平生細計真過分
尚有含飴一念貪

辛未上元前三日雪後集蟄存堂同羅阮嘯

孫贊臣錢越秀童大文任簡人孝明家鶴
澹諸子分賦共呈田間先生

數峰晴雪抱前川
影落清尊意邈然
春淺剛回吹律地
月明恰放試燈天
素心洽處文堪賞
紫氣迎來經可傳
識路漫勞推老馬
眼中鞭弭讓羣賢

春分後一日偕雁湖畱菴家叔子成西郊尋

梅坐古靈泉作

晴郊踏遍古招提
茶話忘機且放眉
蜀日正同吾輩恠
夏雲那及世情奇
柳因寒重開猶澁
梅到春分落已遲
頻悞佳期莫惆悵
老來何事不過時

隱燈

一任浮雲蔽日生
身將隱矣又何爭
塞門小樹寧嫌逼
保障微勞敢自明
閣鎖凌烟圖畫少
珠遺照乘彈丸輕
當前黑白原難辨
只有旁人看得清

送淇源禪師之皋亭二首

杖笠飄然又遠征
幾年舊隱暫逃名
憂時未忍私

白鹿山房詩集 卷九
吾道惜別翻嫌近世情
睡醒空潭龍欲動夢回山
月鶴初驚他時分化東遊倦
看取松枝西向生
幾度西湖願不成
閒雲羨煞往還輕
耳聞形勝多
時熟夢想行程到底生
立馬峰頭難快意
射潮江上恐虛名
此身若在終相訪
共向孤山櫂月明

白燕

非復烏衣國裏人
水晶簾下淡妝新
空梁落月雙栖影
急雪迴風試舞身
柳絮濛濛穿不見
梨花片片認難真
高樓莫繫紅絲縷
縞素相依分外親

張我思表弟招同紹平看花東臯二首

清渠環抱一橋通
山杏初移試小紅
遠岫翠添榆莢雨
平疇香送菜花風
波翻倒影空梁上
日裊游絲淡靄中
閒話偶逢京洛客
始知南畝傲三公
風亭水檻翼層軒
竹裏琴尊屏俗喧
萬頃桑麻爭繞屋
一堤花柳自成邨
舊題尚藉前人重
勝槩還憐異代存
附郭園林原不少
幾家傳得到兒孫

寄柬雁湖二首

身世浮雲一擲輕
把耒悔未學躬畊
債多文字名難避
夢斷繁華道易成
壇坫肯容辭祭酒
鼎鐘端可讓門生
秋螿春鳥情何限
只恐鳴時尚不平

尊前幾度話酸辛四世箕裘七尺身豈惜萬緣空
暮景獨憂一脈繫先人孤懷自守寒松老習靜閒
看朝槿新孔釋如君兩無愧天心終不恡麒麟

黃梅和韻

暗香疎影讓孤山獨領旃檀又一班何處蠟丸來
帝里幾時金碗出人間心如苦蘗禁寒慣魂託黃
冠度嶺還春比松花秋比菊總輸冰雪試容顏

除夕

歲曆纔除臘久除荒邨春到浹旬餘蟄蟲忽起驚
雷後時鳥爭鳴解凍初庭沼雨添波潏灑溪梅晴
弄影扶疎獨憐人事蕭條甚不稱風光是敞廬

壬申元旦

椒盤閒話四鄰來漠漠黃沙午未開孟月陽驕時
可正歲朝日肯數難回糧儲江左新停漕帑發關
西大賑災草野漫勞憂世事都將聞見付深杯

春分日偕雁湖畱菴家叔子成信步西郊共
飯僧舍因憶辛未春亦以是日與三君子
爲靈泉之遊轉盼歲首兩易不覺惘然感
而有作

商山舊侶偶招呼又向城西步綠蕪來記春分如

社燕齋隨午供似巢烏園林雨過花淡淡池柳烟
迷屋有無風景不殊人漸老夕陽分手幾踟躕

胡東湖招集陳北溪暨家伯仲兩兄卽席分
賦時北溪宦遊初歸家仲兄又將適粵撫
今追昔悵然於懷

無端聚散鬢婆娑往事分明一夢過百歲但存真
面目寸心那怕隔山河酒能醉客非關勸話到忘
機不覺多笑指後期畱暮景看誰麾得魯陽戈

送陳甥廷華歸瀨江

骨月無多尚各天到門預怯有離筵畱歡不覺經
三月後會何堪更幾年坎壈老來憂並集音書平
日眼常穿唯餘衰病千行淚灑向秋江送客船

送陳斐文學博之官秋浦

臯比比座勝登仙江北江南咫尺天官舍計程行
半日家山隔岸對終年擁書開院迎都講把酒登
樓拜古賢况有同寮老詞伯琴樽忘却是寒氊

前太

守喻公建池陽書院今太守李公重建
蕭相樓 邗江宗鶴問久爲貴池司訓

奉酬曹念桐表弟拜墓柴林

偏是深秋毒熱新蹒跚嶺路倍艱辛多年宿草誰
還哭千里生芻意最真孝友總推慈母愛詩書獨

與外家親籃輿十載黃邨道回首松楸淚滿巾

姑母

葬姑孰黃邨去郡三十里
余庚申夏特往拜墓下

吸江亭晚眺

近年潮水早秋乾眼底常疑改舊觀只道湖光容
易斂那知江勢本來寬磯頭歷歷墟烟起帆影蕭
蕭夕照殘送盡古今名利客誰從絕頂一閒看

假館吳虞門高齋賦呈主人

手闢層軒最上頭江山滿眼一尊收筦絃花外千
家月枕簟風來三伏秋興到有時工筆墨情多無
計謝交游雙扉便隔紅塵斷下榻還疑在十洲

聞珠姪被召廷對寄示二首

京華落拓幾經秋盛事驚傳召馬周技就屠龍人
共笑時逢買駿骨還收大明本自無遺照滄海偏
能納細流不是相臣勤吐握九重何以慰旁求
無窮聖學歎汪洋理極天人不厭詳千古圖書開
象數兩間律呂協陰陽授時幾見生蓂莢典樂誰
能下鳳凰莫遣寸長虛採擇百年制作待重光

除夕二首

節序推遷又一巡眼中世事奕碁新難將爆竹驅
奇鬼祗見桃符換舊人采選令訛貞女字功名徑

白眉山房詩集 卷九
捷富家貧饑來頗似柴桑老乞食看看是後身
衰頹筋力困紅塵似與窮愁有宿因食蔗妄生佳
境想立錐翻羨去年貧馬歸北叟寧爲福駒失愚
公本不嗔且掩柴關風雪裏殘灰細撥待回春

癸酉元旦

曙色曛曠雪屋明昨宵豈料歲朝晴可能齒髮隨
春轉祇見行藏逐境更枯玳占年逢大有靈著卜
命引前程無聊事事憑神鬼道力都輸與世情

歲朝二日度嶺訪朱農山雪中止宿二首

石構峰尖碧刺天君家山後我山前亂雲堆裏通
層嶺修竹陰中指數椽拄杖幅巾迎薄暮綠尊紅
燭話新年鄰翁頗恠交情重雪滿柴門讓榻眠
几席翛然絕點塵曠懷知是謫仙人駐顏何藥年
重少老筆如花句轉新骨月情滾難却累鄉園意
淡不關貧苾鞋亦擬辭家去汗漫長拋五嶽身

吳門感贈姜奉世

白頭重對淚盈巾往事分明意氣真接日開尊三
地主同時下榻四方人湖山閱歷歸前夢陵谷淒
涼似後身薄俗有誰存古道如君纔不愧遺民

庚余

申夏訪曾青藜于光福時奉世及徐長民同爲地主共集者寧都彭躬菴
閩中余不遠及山足禪師別後諸公皆歿奉世輩並移居城中後青藜客

白鹿山房詩集 卷九
成都門奉世爲之經理家
事撫育遺孤吳人爭稱之

落馬湖

牽船終日傍荒洲
奔突河淮苦下流
隱約數峰支魯國
蒼茫巨浸失邳州
民同鼃黽泥中活
屋似鷺鷥水上浮
歲歲土田逢夏沒
麥秋過後更無秋

宿遷項王廟

荒城破廟夕陽紅
故里蕭條霸業空
自是興亡關氣數
敢將成敗論英雄
從龍恨失無雙士
逐鹿終推第一功
千古精靈知不散
怒濤長打濁河風

夏鎮懷古

烟火千家古沛中
驅除當日藉重瞳
西行早定興王業
東向全憑拜將功
泗水蒼茫風尚起
碭雲蕭瑟氣還空
卽今與仲爭多少
笑把山河傲乃翁

泰安道中

寧陽北去亂峰多
齊魯分疆隔汶河
嶽色遠迎人面起
溪聲頻送馬蹄過
沿却鳥語藏深樹
夾路蛩吟覆淺莎
彷彿故園風景在
夢魂何處覓烟蘿

仲秋過濟南訪喻武功觀察四首

山東一百四州縣
憲府聲名遠近傳
但見下僚門似水
始知化國日如年
俗淳鄒魯還三代
歲稔青

齊獨二天自是精誠能動物由來方寸有微權
玉尺冰壺弱冠聞比年風節更趨羣官居方面貧
彌甚天與長才老益勤是谷總歸東海水爲霖都
望秦山雲莫憂拙宦因緣少悃悃多時結聖君
祭戟森森擁百城偏將冷眼著淡情衙門高隱停
車訪縫掖知名躡履迎官舍齋鹽閒有味賓筵絲
竹靜無聲尋常攬勝耽吟慣爲問新編幾許成
萬間廣廈託帡幪盛德常扶造化窮不憚空羣收
駿馬幾曾小技棄雕蟲妻孥軫恤猶身後故舊饑
寒每意中難恠信陵門下客辦香齋祝海天東

廢寺

峰頂當年開古寺偶然指點尚依稀齋時磬每招
鳥下月夜僧常帶虎歸敗井今飛花蛺蝶影堂空
長野薔薇潮音幾度驚清梵忘却松濤響翠微

過曲阜恭謁孔廟四首

頰仰乾坤第一人獨將木鐸振羣倫文明爭睹中
天日教澤常畱萬古春是聖是賢難伯仲何時何
地不尊親只今七十餘傳後猶向王家作大賓
邑供湯沐竟千秋家令遷除亦自由六代鼓鐘原
在魯四時俎豆尚從周金絲縹緲元音合車服輝

煌禮器稠兵燹向來誰敢犯天心每爲聖人畱
天爵何煩十二章道存縫掖有餘光春秋定分嚴
臣子唐宋尊稱侈帝王家廟至今崇像設宮墻隨
在薦馨香易名合正先師位木主崢嶸遍八荒
碧瓦朱甍霄漢邊德容肅穆仰如天聲靈長使中
華貴尊禮翻成世主賢闕里豐碑叢百代杏壇喬
木蔭千年欣逢駐蹕親祠日廟貌重新御府錢

除夕

時客桓
署臺中

官舍開尊餞歲華清歡差足慰天涯不論賓主無
非客但對親朋卽是家多病浪期探海嶽餘年翻
遣負烟霞燈前萬感消沈醉戲語兒童一笑譁

畫負臥雲巖前萬嵐前出輶遺發良童一芙蓉

白鹿山房詩集卷十

桐城方中發有懷著

七言律

甲戌元旦

荒城車馬不聞喧
令節蕭閒共一樽
幕裏本來無客謝
坐中最苦是年尊
朔方雪少河難凍
閏歲春遲氣轉溫
忽憶故園松竹冷
梅花爛漫掩柴門

入冬無不凍者
獨西冬無冰

送周聖西歸武林二首

策馬胡為遠
只道對畱古道
使人思觸邪
有角難

移性照影無弓莫抱疑不恨何妨劉四罵懷慙都
畏彥方知天涯衰病心尤苦絃絕知音是子期
不肖低眉說賤貧君才豈是捉刀人鋼從百鍊操
逾厲刃解千牛技亦神轍跡關心揆阨塞簿書假
手試經綸摩抄老眼相期切珍重風塵七尺身

般陽唐太史豹巖先生招飲郭西別墅感成

二首

先生官檢討諫修化書被
斥里居四十年著述甚富

崢嶸風節老詞臣名重先朝早乞身一代文章經
世業半生山水讀書人表焚佛骨寧辭罪詩賣雞
林不救貧莫道歲寒容易耐天心特與護松筠

百年師友重江東竟許龍門姓氏通班草遠從塵
劫外傳薪直在性情中午橋侍酒痕盈袖蕭寺聯
吟字滿筒何意白頭般水上舊遊閒話一尊同

先生

爲吾鄉姚端恪公門生曾遊龍眠後
訪先文忠公于青原墨蹟尚存笥篋

臨邑署中示家弟秋邨

老去生涯託研田他鄉聚首轉堪憐
依人同作三齊客序齒都過半百年
撩亂秋鴻寒雨外飄蕭風葉夜燈前
故園尚有梅花屋歲晚相期大被眠

趙秋谷中允有母喪詩以唁之

愛著萊衣解組輕范公泉上掩柴荆
逍遙正羨潘

白鹿山房詩集 卷十
懷令哀毀焉知阮步兵繞屋烏嗥霜四野滿林風
響月三更豐碑更有瀧岡表一字書成一放聲

客桓臺承孫楓麓表兄枉詩見寄賦答二章
患海歸來五十年雙扉淡閉市塵邊井函史在誰
能見紙筆兒多盡可憐對客祇聞經典語思親最
痛蓼莪篇商山舊侶知多少終讓淮陽一老賢

阿咸初命獺河東北歲相依禮數隆君獨忍貧甘
采藥我偏垂老歎飄蓬琅玕勞寄江湖遠甲子真
慚齒髮同決計歸船趁春水對牀淡話兩衰翁

為楓麓兄子憐其宦况清
貧絕不一往又與予同庚

贈宗弟遂菴明府兼以志別二首

海隅小邑近蓬萊特為探奇到此來官署屋從前
代毀山鄉城少四門開俗淳可廢催科法民樸兼
虛折獄才却笑清貧還好客公餘日日倒尊罍
他鄉漫游逢弟兄最愛山水環孤城千峰萬峰踏
秋色十里五里聽溪聲扶醉看花蹇驢瘦苦吟坐
月寒雞鳴明朝分手掖河道回首白雲無限情

杪秋客招遠偕家姪月坡碩庭觀海蓬萊雜

咏十首

危欄百尺倚層空天海蒼茫極大東始信九州真

有限不知六合竟安窮輿圖還闢滄洲外日月長
生積水中渺渺神山看恍惚凌風一笑白頭翁
碧波無際湧孤城重鎮當時十萬兵祗恐島夷輕
犯順誰思藩帥敢橫行雲霞尚閃旌旗色潮汐常
喧鼓角聲舊事淒涼詢老衲轉憐此地久昇平
遺蹟分明史冊傳幾回弔古意茫然鮫人夜泣征
遼卒蜃氣朝浮橫海船諸島北來猶有地大洋南
去竟無天祖龍威力誰能敵魄奪滄溟亦可憐
五百人爭一劍輕千秋孤島屬田橫雨淋陰火青
燐暗霜染寒濤碧血清自古英雄誰免死至今魂
魄凜猶生中原興廢知多少何事潮頭怒未平
海市冬開往事神端明本自謫仙人現前世界無
非幻不朽文章轉是真斷碣模糊當日字荒祠彷彿
再來身道山只在滄波裏試跨長鯨一問津
登州隔岸指遼陽千里風帆亦易航本在職方歸
共主也會移粟賑奇荒波濤一旦封邊境道路多
年斷海防此日重看輸輓近百年轉盼幾滄桑
頻年骨肉各飄蓬豈意登臨此日同千里客來沙
島上一家人坐海雲中長風簸浪山皆動巨浸吞
天鳥亦窮憐汝片帆曾北渡眼前何處認遼東

蓬萊閣底水雲邊，恠石叢叢別有天。城壓懸崖危欲墮，潮侵陰洞冷難眠。浪花白隱仙人島，夕照紅歸估客船。笑問投竿東海上，六鰲釣得是何年。蒼然暮色隱樓臺，精舍窗臨絕壁開。萬里波光秋月上，滿山風響夜潮來。把杯此地少閒客，借榻一生能幾回。夢醒忽聞清梵起，勞勞浮世亦堪哀。海上探奇遇最艱，我來恨值暮秋閒。氣清島嶼難成市，日出東南已礙山。鞭石神人何處問，樓船方士幾時還。望洋歎息空歸去，細想遊仙總是閒。

別鄒平馬七子握

縞紵論交古道真，伏生祠下幾經春。鶯花寂寞愁歸客，風雪淒涼別故人。誰識元龍湖海氣，何妨伯起子孫貧。千秋大業青緇在，莫負辛勤硯北身。

子握

尊人宛斯先生所著有釋史及左傳事緯二書官靈壁令沒後甚貧

乙亥元旦戲示孫湘南明府

滿城雞唱曙鐘鳴，衙鼓重開第一聲。画寢凝香人穩臥，公庭燎火吏催行。六街馬踏層冰滑，四座衣浮積雪明。笑我消寒無一事，屠蘇百斛賭詩成。

又與諸子分韻

天涯節序俗全非，雙淚泫泫暗溼衣。十日春光消

舊曆一簾寒色散斜暉
讓人歲酒難藏老滿耳
鄉音不當歸為報東風催
解凍扁舟好去理漁磯

又示璐姪

千里河山客思長
南天何處雪茫茫
平生閱歷誰佳境
此日團圓半異鄉
凍雀栖風枝不定
驚鴻背日冷無行
遺經尚想傳家在
縹緲爐烟誦一堂

西軒夜坐和湘南作

訟庭霜冷月華新
觴咏悠然似隱淪
一卷蠹書當日讀
三間茅屋昔年貧
琴聲靜聽瀟湘水
鶴影驚看磊落人
我本山中老遺逸
對君翻覺媿松筠

亥春南還再經淄川畱別時大峰明府二首

文章此地有龍門
借鶴樓頭許細論
和句不慚追襲美
聯吟直欲抗軒轅
穿花馬熟清溪路
帶月人歸碧樹邨
不是虛懷勤問道
雲關高臥謝塵喧

與唐豹崑先生往還甚密唱和聯句多即席而成借鶴樓者唐公西郊別墅也

自與鴨江公子別
風流不見十餘年
更誰江左稱名士
忽漫山東遇謫仙
嗚鳥聲中畱客醉
古槐陰裏把書眠
白頭已分知音絕
愴惻為君再整絃

有哭佟鴨江詩為余讀之因不勝懷舊之感

秋杪拜陳文靖先生墓

葬三台山

三台秋樹鬱嵯峨馬鬣初封策蹇過不盡紙錢隨
落葉無多絮酒滴寒莎情淡難禁西州淚身老那
堪下里歌四十餘年夜臺客相逢此際痛如何先生
與先府君交最篤府君下世在順治己丑距今幾四紀矣下里卽古蒿里

和毘陵吳任菴先生蘆中吟同步唐太常原

韻

先生諱琪滋中順治壬辰進士歷官閩楚屢經患難歸隱蘆荻莊莊爲唐太常別業再易主而後歸于公太常舊有此詩公因三疊原韻四方好事者多聞而和之公子天階游吾桐復索和於同志云

新水長堤花滿洲書牀酒榼坐揆幽林塘幕歷墟
烟晚葭莢蒼茫水國秋百代寒暄從過客五湖風
月自扁舟滄浪何處歌聲起目斷長空萬里流

蓬門春暖燕啁啾芳草垂楊野逕幽彭澤歸來高
臥穩邯鄲夢破此生浮漫憐花鳥無常主到底江
山屬勝流畱得杜陵詩一卷草堂片地已千秋
我思索題藍菊走筆和之

藍菊爭傳白石城石湖菊譜未知名可憐物態逐
時異也遣籬花新樣生晚節香寒憐翠袖落英餐
飽傲青精碧空一色開無際影倒秋池認不清

琉璃鉢內朱魚和家翁東來作

金鼇乍掣水晶宮一片晴波射眼紅繡尾分明無
障礙錦鱗飛動滿虛空那知升斗藏猶淺但覺江

湖趣不窮好送琴高上天去壺中自有路能通

贈別宣城施孝虔

愚山先生次子

春城風雨老鶯花詞客重遊感歲華名熟渾疑曾
識面交親不獨爲通家園林孤往連朝徧詩草乘
閒逐日加我有柴門江水上停橈試一話桑麻
伯兄移居紹修堂顏其書室曰漚招同仲兄

小飲命題以詩

暫移別業傍城東故第依然在眼中繞膝兒孫來
不斷隔鄰烟火語相通含情莫惜分巢燕寄跡無
非踏雪鴻珍重尊前老兄弟幾家得共白頭翁

自濟南歸里哭伯母大人兼拜遺命

追思罔極痛何如五十年閒奉板輿直似孤兒親
尚在但稱猶子誼還疎老來自恨偏爲客病裡傳
聞日倚閭此罪通天那可贖斷腸難捧數行書

別仲兄還山

同是終天抱痛深門庭猶幸有知音傳書那藉兒
孫力絕學長畱祖父心富貴一生唯筆墨風塵何
地不山林餘年聚散誰能主把酒相看淚滿襟伯

易簣之頃兄客恩州余客濟上兄著述甚衆傾貲鏤板筆畊所獲皆耗于此兄著心學宗續編述明善文孝貞述文忠四世理學語錄皆傳心之要四方爭購之兄葬親後尚擬遠出卽予行藏亦尚未定

除夕

頻年節序各西東今夕鄉園豈意中飽我一家唯
疾病誤人五嶽是兒童烟塵欲動悲身老雨雪雖
宜苦歲窮寂寂酒闌燈炮後團圓未覺勝飄蓬

丙子元旦

歲朝共說春難遇十二年來見兩年臘雪乍開晴
樹影寒雲猶戀晚峰巔蠲租屈指輪南國繕甲驚
心備北邊肥遯轉疑占象好可容衰白守林泉

漕糧次第蠲免丙子應及江南檄下州縣捐貲
造甲為北征之用余元旦撰著占得遯卦上交

聞瀨江陳愚伯入關感賦長句

已辦龍荒沒覆盆一朝何意拜殊恩端明老竟歸
陽羨定遠生猶入玉門到眼江山增涕淚滿頭霜

雪認兒孫最憐噩夢驚初覺剪紙難招絕塞魂

愚伯

以順治乙未遣戍瀋陽今春督運于公特疏為之奏請遂奉恩命放還鄉
里先是愚伯諸子有在南者近為至戚誣訴被逮入都考鞠歷三年事甫得
白而愚伯旋已
挈家入關矣

清池上人自月溪移住西峰蘭若

別領精藍隔舊林可知三宿本無心閒身誰禁雲
來去道力寧隨山淺溪谷口泉清仍共汲峰頭月
在儘孤吟翻憐平日溪橋路松竹蕭蕭客懶尋
中秋偕友人邀溪莊自石塘泛月歸宿鹿湖

分賦

潮滿平湖月滿輪秋空澄澈暮霞新山長水遠一
孤艇露白風清三兩人物外何時無勝境尊前幾
處有閒身倘能佳節常相聚華髮蕭蕭肯厭貧

石樓上人既受月溪之請復以道友主之夏
秋以來僅兩過山中不數日輒去無由把

晤悵然有作

多年幽興想林巒駐錫何如此地安梅影半窗撐
雪月松聲四壁撼風湍溪公尚覺嫌山淺陶令徒
疑入社難轉憶海天雲水外交親滿眼日盤桓

向思住余南洋不果後甲戌秋相遇于濟南同
時沈范諸子並集上人爲画便面題詩見貽

送汪子燮再客粵西

嶺外吾鄉人不少壯遊屈指似君稀知雄誰信守
雌是刻鵠應疑画虎非每歎飄零輕瘴癘不辭辛
苦爲庭闈鬱林此去六千里借問雲帆何日歸

長干寺塔感和友人作

孝文皇帝報慈恩宇內從無此塔尊五色琉璃光
萬丈九重燈火影千門雲霄尚想神京壯氛祲還
悲下土昏王氣消沉人代改空畱一柱鎮乾坤

寄酬新城王少司農阮亭先生五首

大槐奕葉蔭何長。画省還移白玉堂。才子馳名動
宮禁。官家破格與輝光。多年供奉恩難紀。他日巡
遊問不忘。台鼎世傳成舊物。九天雨露看尋常。由公

司李擢儀曹郎旋入翰林內庭供奉此異數也後公里居 上南巡過濟州
特召見慰問有加禮焉公家有古槐世為瑞物海內稱大槐王氏即司徒一
官逮公已
六世矣

王程萬里快平生。九點齊州海一泓。筇杖手攜巴
子國。荔枝飽啖尉佗城。馬頭秦晉川原古。帆底荆
揚風月清。最愛六年邗水上。江南江北徧題名。奉公

命有事四方所過輒成集
唯官廣陵最久題味獨多

白雪樓荒大雅淪。漁洋絕調更清新。寸心自許有

千古。四海故應無兩人。莫道巨山聲望久。倍憐塵

詰性情真。中原耆舊彫零盡。獨抱遺經盼後塵。李滄

溟白雪樓已毀移建趵突泉上公詩
題漁洋山人集與滄溟指趣稍異

花萼休傷次第殘。風騷當日並登壇。傳家簪笏盈

床易絕世文章。一字難眼放泰山。真覺小胸吞雲

夢未為寬。瑯玕解贈慚非分。賤士何知報玉盤。

海雲嶽樹繞離思。花下會題別墅詩。妄想雨珠承

欬唾難逢冰鑑別。妍媸望洋空上蓬萊閣。破曉虛

摩日觀碑。誰識歸來抱三恨。寸誠惟有瓣香知。游

山左最久登泰山未見日出蓬萊未見
海市客新城未見王司農此三恨也

白鹿山房詩集 卷一
酬江磊齋觀察三首

登科屈指正青春。四十餘年老搢紳。官轉七階非
不貴。家無半畝奈何貧。炎涼閱歷窮邊徼。旦暮升
沈聽大鈞。獨羨宦遊題咏徧。風流常繼古名人。
拂衣一笑便還家。萬卷重開興轉奢。自有文章爲
苑囿。儻來官職等泥沙。夢回枕上三竿日。思湧毫
端五色花。不是前身仙骨在。寂寥誰肯戀烟霞。
短髮蕭蕭一釣竿。到門鷗鷺日盤桓。芰荷香擁扁
舟醉。松竹陰埋老屋寒。乘興豈無佳客過。素心終
覺解人難。論文謬許吾何敢。惟有湖山耐飽看。

來時 初夏過訪家叔漢良湖邨卽事二首

河橋舊隱熟知名。竹塢松坪辨不清。差路問多邨
犬鬧。蒔田歌亂午雞鳴。家人畧分親風雅。外客忘
形樂送迎。何事龍山拋講席。支筇空憶款柴荆。
草廬無恙可躬畊。寄廡翻疑浪入城。痛飲東頭老
兄弟。擁書南面舊師生。籬花旋種軒墀淨。邨樹成
陰几席清。笑我論文貪坐久。夕陽分手不勝情。

表弟張隨齋奉使還朝道經里門賦贈五首

生來籍注大羅天。初上鼇峰最少年。視草不離清
禁裏。講書直到御床前。身經絕漠長依輦。位逼中

台早象賢。殿上定看屏隔坐。一門原被主恩偏。
鳳毛名重廿年餘。才思飄然切太虛。供奉幾家同
父子。官曹一樣掌圖書。唯憐鴻雁離羣久。轉苦枌
榆賽社疎。漸喜吹箎添仲氏。計偕昨已上公車。
拜命剛容出紫宸。祝融峰下壁初陳。珠宮俎豆趨
羣吏。金節威靈拱百神。橘熟洞庭霜後暖。梅探嶽
寺臘前春。南荒氣候雖多異。疑是陽和逐使臣。時奉

命祭告

南嶽

故里經過似爾稀。星軺一路擁光輝。椎牛上冢聊
乘便。衣錦還鄉未算歸。努矢前驅勞郡縣。觚稜入

夢憶庭闈。嚴程計日朝天急。四牡還衝雨雪飛。
堂背多年萎樹護。兒孫尚飽外家恩。蓬廬曾枉高
軒過。草具都忘八座尊。一紀星霜懷舊土。九天雨
露仰修門。過庭他日如垂問。爲報長饑骨僅存。

寄東邵武龍茗麓司馬改調臺灣三首

上苑看花不記年。同時人半珥貂蟬。一麾典郡猶
嫌屈。三領監州豈算遷。拙宦轉因高第誤。長才空
被上官憐。海隅已恨君門遠。渡海那堪更幾千。茗麓

以中翰出佐太原。丁艱補授
邵武。今調臺灣。凡三任郡丞。

熙春臺上幾春風。溪鳥山花識醉翁。雨溢蔗田千

畝綠。霜晴橘圃萬家紅。高名不讓白司馬。展足何
如龐治中。我有相思無處寄。天南一向少蜚鴻。
棘闈分席衆爭推。直探驪珠入手來。一代文章今
最盛。八閩風氣獨先開。墨莊豈爲兒孫計。藥籠無
非獻納材。萬里近承宣室詔。可憐虛拜特恩回。
癸酉分校閩闈。解元出其門下。丙子奉召陛見。

見友人咏桂花詩走筆和之

細蕊濃芳溢露華。滿庭秋月影交加。一枝分出清
虛府。八榦爭攀富貴花。雨灑諸天總金粟。米拋平
地盡丹砂。小山昨夜西風起。香徧淮南百萬家。

雜擬應制詩二十首

曙色曈曈拂羽旗。宮鶯初轉萬年枝。御爐香湧層
霄滿。天樂風飄九奏遲。漠北降蕃歸宿衛。河西侍
子習朝儀。臣民願覩登封盛。繞闕歡呼動玉墀。
禁苑年光迥不同。翠華冉冉度春風。旌旗曉散烟
花裏。樓閣晴開繡畫中。戲賭魚龍裝百隊。香迎蜂
蝶舞千叢。太平天子渾無事。行樂多時駐別宮。
離宮十二總新修。複道金輿任意留。桂殿名花徵
卉服。梨園絕藝選涼州。江頭錦瑟三春宴。馬上霓
裳五夜游。賴有開元賢相在。清平不用聖人憂。

浩蕩堯天雨露濃大酺海內慶時雍琅敷闕下聞
仙樂燈火樓頭仰御容田鼓鼙鼙喧楚艷漁歌嫋
嫋和吳儂至尊欲曉民間事閒采風謠入九重
頻年水旱併堯湯膏澤殷流徧八荒衣賜尚方歌
父老圖傳中禁勸農桑縣官屢下蠲租詔鄉社常
開積粟倉見說助邊多卜式涓埃何惜報君主
細旃披覽達宵晨玉躡金題爛紫宸百代鼎彝歸
國寶九州翰墨進家珍麟臺破格徵名士螭陛分
班課侍臣尚恐經筵成故事別開書閣許相親
煌煌琮璧報神祇功德多年紀四陲南幸會稽探
禹穴東封泰岱撫秦碑玉枰大藥延方士金印頭
銜拜國師共祝聖君千萬壽竹宮猶自歲親祠
新秋侍讌集瀛臺水殿迎涼四面開玉几坐揮天
上筆銀璫宣賜御前杯昆池柳蔭遊魚樂蓬島花
穿舞鶴來百辟詩成齊獻壽鳴珂一道謝恩迴
帝里園林鎖翠微江南風景見依稀妝樓掩映迷
花逕画舫參差隱釣磯歌管日長鶯百轉舞筵風
暖燕雙飛蓬萊宮闕雖然盛只恐仙遊亦忘歸
白羽解弓破朔風貔貅萬騎簇回中青林嘯起人
媒鹿赤手生擒輦道熊血捧金盤先上壽肉分羶

帳細論功武皇大有開邊志諫獵無勞獻賦工
歲歲鑿輿出塞頻六軍計日埽邊塵九天旌纛風
雲暗萬里烽烟斥堠新泉乏陰山愁飲馬沙沈瀚
海怯埋輪功成祇合歸明主誰是麒麟閣上人
鏡吹凌雲沸鼓鞞初從青海斬鯨鯢風來絕漠駝
先覺道盡流沙馬亦迷漢代勒銘懸斗北周王馭
駿極天西何如聖德兼文武露布驚傳御手題
猿臂將軍舊有聲解圍還仗出奇兵長驅虎旅收
荒塞親護龍旂返禁城報主敢希茅土貴忘身不
問鼎鐘名况勞御筆題詩賜鐵券金章轉覺輕
鸞輅時巡古帝都壺漿到處擁前驅千門香焰
天暖萬歲嵩呼捧日趨御道雲霞籠帝冕官街塵
土伏糴輸行宮未忍勞民力敕借親臣宅一區
十丈樓船五丈旗寶窗晴射碧琉璃雲中簫鼓凌
風迴鏡裏帆檣帶月移錦樹萬花迎媚蝶金蓮千
炬泛靈龜繁華自昔誇吳越爭似昇平大統時
警蹕毋煩羽衛陳龍顏特與萬民親曲呈估客江
南樂宴賜天家海外珍山鳥解歌行幸地野花爭
笑太平春漫稱風化周南美士女何曾識聖人
司農稅籍半江東勸課頻勞省聖躬耆老賜錢親

問俗書生獻賦取觀風股肱重寄淮陽守壁馬催
成瓠子功更有天心弘帝澤歲星臨野十年豐
昭回雲漢下星槎綵幄承懽道里賒驚睹一人將
聖母始知四海盡官家延年恰進餘杭酒獻瑞應
開后土花不是孝思超古帝三宮容易幸天涯
聰明四達萬機閒攬勝東南睹一斑煥爛天章懸
日月淋漓御墨灑江山外臣盡許霑恩賜荒服常
如仰聖顏知有百靈嚴護守榮光偏燭斗牛閒
仙駕飄飄扈紫雲垂衣不僅事虛文親祠闕里崇
儒重大狩岐陽閱武勤萬幕迎鑾朝屬國五營開
壁勞將軍桑邨麥隴經過地天語人人喜共聞

丁丑除夕

暮景淒然掩華門。舉家含涕對清樽。非無壯子偏
爲客。那有衰年不見孫。一室磬懸虛歲稔。多年被
冷幸冬溫。問安獨愧東牀壻。節序依依禮數尊。
是秋

孫壻姚雁
泉入贅

戊寅元旦

日暖茅檐香滿庭。陽和難改鬢星星。病妻漸免扶
藜杖。穉子麤知讀孝經。梅趁臘晴千樹白。柳催春
早數枝青。酒狂添得西隣叟。四座何人許獨醒。

尋梅月溪示曉峰上人
重葺招提軒檻新。幾時飛錫領松筠。長明燈下跏
趺坐。壞色衣中清淨身。晴嶺曉鐘山鬼滅。寒溪夜
梵毒龍馴。疏狂偏許柴桑老。相送橋頭意倍親。

潘木厓先生八十初度

六朝壇坫仰遺賢。豈獨逍遙享大年。耄耄眼前隨
地有。姓名海內幾人傳。會同洛社推君實。老入香
山羨樂天。自是文章能不朽。千秋風雅在龍眠。

有龍眠風雅之選。

寄磨旗菴樵隱上人

繫艇荒堤古廟前。竹房茶話舊因緣。多年市上無
行跡。一榻峰頭老坐禪。烟火乍迷輸輓地。風波不
斷往來船。何當共放山樓眼。收盡長江萬里天。

過南汀舅氏寓齋感話二首

六十年前墮地悲。兩人父祖不堪思。濟南烽火捐
軀日。湖北疆場陷罪時。生共百憂逢亂世。老存一
息痛孤兒。家讐國恤何從說。頭白相看涕泗垂。

舅氏

與予同生己卯是年春外祖方伯公殉難山左
先祖撫楚亦以是冬爲楊嗣昌所陷被逮入都

忘情竟作信天翁。風雨飄搖萬事空。杖影蕭蕭雲
獨往。詩懷浩浩海無窮。更何長物關身外。那得繁

白眉山房詩集 卷一
華入夢中。半世踈狂人。莫笑。要將苦節慰孤忠。
慈大人生忌拜墓柴林

壟樹彫殘風滿林。劬勞此日痛偏深。夢魂不記平生面。想像空憑一寸心。入地幾時烏反哺。仰天何處鶴鳴陰。擁爐獨撥寒灰坐。暮雨蕭蕭杖淚吟。

六十初度坐懷廬作

幸週甲子豈非天。坎壈回頭轉自憐。都爲藐孤憂一綫。誰知多病獲長年。躬畊不惜終身賤。家學唯慚累世傳。峰頂數椽判送老。可堪塵網更相牽。

小年夜感示沃園大姪

時鳧宗弟寄家通
州獨與瑄兒入秦

家畱薊北父秦關。獨汝扁舟返故山。遙憶吾兒同旅館。何期猶子伴衰顏。一堂歲酒人離別。幾處寒燈夢往還。績學喜無紈袴習。不妨年少歷時艱。

任鶴峰先生延石樓上人來主月溪淡莊約
攜果蔬造訪別具一尊自酌劇談竟日而
歸

眼中猶是舊松筠。物換星移不記春。開社若無賢地主。住山那得素心人。梅花抱屋暖爭笑。苔色染庭清絕塵。解道遠公容客醉。時時載酒未嫌貧。

哭仲兄陪翁

棣華零落淚沾巾。彷彿平生笑語親。吐出名言多
創解。悟來絕藝盡通神。哀時每抱孤行志。赴難曾
判七尺身。今日蓋棺知論定。幸留面目見先人。

除夕感懷伯兄

計十年中世母大人及兩
兄兩姊三孫先後下世

骨月團圓十載前。只今回首益潸然。春鴻零落成
行少。雪絮淒涼斷句傳。繞砌蘭空難記日。背堂萱
冷亦多年。離羣獨剩東坡老。風雨何時對榻眠。

除夕二首

眼昏齒豁任餘生。世故紛紜感物情。地少雞豚官
稅重。邨多豺虎土人驚。四時節亂冬長暖。萬嶺風

高火徹明。隨分杯盤兒女樂。不知何事醉難成。
修文早歲痛嚴親。屈指今朝大耋辰。愛日有心虛
寸草。延年無地仰靈椿。辛盤尚想當時臘。戊社長
為泣血人。猶幸鐵函留史在。千秋知是宋遺民。
先

人以除夕生
是年八十

己卯元旦

崇禎己卯先祖中丞公
撫楚余生武昌幕府

新曆重繙己卯年。我生初在四朝前。碧油幢下懸
弧矢。黃鶴樓頭奏管弦。陵谷只餘家國恨。箕裘難
望子孫傳。可憐雙鬢垂垂白。追話開元意惘然。

咏龍燈三首

行行銀燭碧紗籠，幻出遊龍下遠空。歷亂星河翻
倒影，蒼茫寒燒舞迴風。點睛誰信飛騰去，蛻骨方
知變化工。莫笑扶持藉人力，丹心耿耿吐長虹。
花虬七色耀星躔，首尾分明勢蜿蜒。長夜欲教銜
燭照，驚雷肯讓抱珠眠。成羣血戰爭于野，啟蟄身
存尚在田。萬丈光芒鱗爪露，絳霄直上是何年。
急鼓聲喧動地雷，長虬爭駕彩雲來。水晶宮湧千
珠走，鐵鎖橋衝萬炬開。金甲鱗鱗光煜爚，朱髻焰
焰影鬢陽精似。惜乾坤暗不到天明，不肯回
詩成和者甚衆，因更戲題一律。

焮天鱗鬣鬪飛揚，未許鼇山獨擅長。無數杖成頭
角起，一時劍射斗牛光。休因擾狎輕神物，聊顯精
靈入戲場。試看禹門燒尾後，紫雲高擁帝車翔。

芸香館落成爲我思題

芸香在涉園中先
外祖方伯公手植

萃軒新闢舊平泉，三代芸香尚宛然。儘把山林試
經濟，轉教廊廟羨神仙。達夫未覺詩名晚，貞白偏
推隱逸賢。畱取百年書種在一門，忠烈汗青傳。

任行人蘓臯垂憶賤，辰枉書存問兼貽。冠簪
口占謝答時任新娶，因戲及之。

秦女由來夫壻殊，雲屏初展合歡圖。金蓮燭下私

吳語玉鏡臺前笑老奴妝閣曉開眉早画朝衣夜
著手親扶尋常半臂均憐惜敢比天孫織錦無
雙雙白髮老清貧訝許金貂照眼新野外遺簪誰
念舊車前戴笠獨相親銀釵豈稱夔州女文冕那
堪越地人莫笑家寒無可報已從天上借麒麟

送任簡人入都赴令兄蘅皋之約二首

幾年勸爾上長安繞膝貪承菽水歡攀柏只今饒
滄淚飄蓬難更保團圓河橋驢背麻衣雪野店雞
聲凶枕寒迢遞關山憐陟岵不堪回首向南看
池草春來入夢吟此行不用碎胡琴憐才意比錢
刀重知己恩同骨肉淡漫道郢中無白雪也曾臺
上有黃金寂寥只歎南邨老共賞奇文少素心

吳門周南野昔與余邂逅鄒平馬子握家奴

匆別去距今五載忽來龍山閒一遇之客
坐相顧疑而未發者久之後聞于淡莊雪
中唱和甚歡心異其人復往就晤敘次舊
遊始大驚喜因招過南浮畱連竟日良會
不偶紀之以詩因成二首

幾度相逢認未真似曾相識怕相親祇緣野性成
疎懶羞向時賢假笑頰空谷飛來歌裏雪好風吹

白唐詩集 卷一
入坐中春憐才畢竟推吾黨
肯讓尊前失故人
舊遊零落感山東
此地清尊豈意中
天下有心人
最少世間難料事
何窮高梧差比孤
懷傲恠石疑
從画手工好景
當前休惜醉爲君
暫埽客愁空

南野枉詩見憶率爾奉答

相看咫尺不相見
何必千山與萬山
滿眼波濤愁
桂楫幾旬風雨臥
松關尊前春色歡
難再枕上秋
聲鬢易斑
莫遣羈懷歌太苦
窮途贏得一身閒

雨後乘漲過大龍巖舟張家橋下距淡莊僅
數武此從來所未有也暮歸蔣子陶邨送
予溪上竚盼久之已而成詩寄示走筆奉

答

雨漲千峰倒峽流
江潮袞袞蹙林丘
枯槎百尺走
天上柔艣一枝鳴
樹頭路斷野橋無
過馬波翻邨
落有浮鷗老夫六十驚
初見海屋君曾下幾籌

寄懷內兄余東望

歸老沱川數畝田
追思往事尚依然
夢回蜀道青
天上膽落蠻鄉瘴
海邊一局棋收閒
袖手半牀書
在擁高眠漫憐三仕還
三已消受林泉幾十年

七月旣望招集吳門周南野陶邨蔣鍾全淡

莊劉石航泛月

乘興扁舟亦偶然風光偏覺勝從前野潮恰比常年大山月仍同昨夜圓秋到人間催酒殘客來天外賭詩篇相看不用憐華髮且傍沙鷗一醉眠

秋入里門適值東來第假歸省覲懽聚旬餘

臨別漫題長句

君方下馬我停車一笑驚逢泛海槎野老久無心入市宦遊真不料還家忙搜篋笥徵詩學怕數寒暄感鬢華他日相思最淡處滿輪秋月滿城花

輓劉畱菴二首

畱菴為鼎元公少子幼而孤其長子亦死固舉庚午解耋畱菴性愛樸素而好佛

翁占鼇峰子解頭誰言作述兩無憂生為華胄不偏早老有榮封歿未酬錦繡叢中長衣褐鷓鸞侶外獨盟鷗靈光不受紅塵澹證得前身古比丘風雨城南借一枝閒門晝掩耐舖糜交際老友少相識名譟諸郎如不知拄杖久孤山寺興淡杯常憶竹林期夜臺親故爭歡聚弔影翻增後歿悲

親友相繼淪沒

題張硯齋悼亡詩後

尚書兒婦尚書女剛主蘋蘩十二年天與性情皆內則身忘富貴是家傳于歸未識姑嫜面偕老長

虛黻珮緣難恠悼亡人慟絕哀辭猶荷阿翁憐
雜擬懷古詩二十首

咸陽

秦城漢闕莽榛蕪百二雄封壓九區形勝千秋爭
戰地繁華歷代帝王都關門尚掩洪河險畿甸空
標華嶽孤底事唐陵佳氣歇更無人問舊黃圖

長安

自唐以後無建都者

洛陽

東都宮闕幾消沈荆棘銅駝歲月淡南北無端分
國史是非從此亂天心三川寒水流人代二室春

雲幻古今莫道地形當四戰干戈何處不相尋

洛陽爲四戰之國謂四面受敵無險可恃也

鄴都

蕭蕭漳水咽秋風芳草迷離舊鄴宮一代文章歸
父子三分功業鬪英雄金人泣罷盤何在銅雀歌


殘帳从空禪授可憐成故事枉臨天塹想江東

魏晉

稱禪之後五代唐宋莫不踵而行之曹丕伐吳臨江而返未幾國亡歸晉矣

金陵

八代衣冠委逝川東南王氣轉堪憐偏安自昔難
長从大統方開亦變遷鳳去荒臺常弔月烏嘯廢



原件模糊

闕舊朝天降旂莫笑無籌策幾度生靈藉保全金都
陵者惟有明為大統一傳而有靖難之變卒遷燕京南都不
過虛名耳金陵不能固守冠至即降以故得免屠戮之禍

廣陵

世四橋邊蹴灑壚風流會記阿麼無人迷荒草樓
何處霜打長堤柳數株兵變自來爭要地奢豪終
不改通都竹西歌吹年年盛舊壘誰聽子夜烏阿麼

隋煬帝小字迷樓址在蜀岡

姑蘓

江南名勝甲三吳佳氣依然想霸圖夜月笙歌虎
丘石春山烟雨洞庭湖蘓臺寧復有麋鹿越殿也

應無鷓鴣轉盼升沈等閒事卻生憂患歎歡娛慶洞

即太湖越殿鷓鴣句本太白

彭城

一片彭城古戰場重瞳裂地自封王豈知雲氣依
芒碭枉費洪流扼呂梁何處築臺會戲馬幾時衣
繡得還鄉平生快意都西楚高會公然讓漢皇項羽

自封西楚霸王都彭城即今徐州城臨黃河有呂梁洪之險會
築戲馬臺于此後項羽伐齊漢高祖引兵破彭城置酒高會

汴梁

黃河遠瞰汴城頭極目荒堤起昔愁艮嶽花空人
北狩平臺客散水東流泥沙何日埋雙闕燈火多

年斷十樓却訝夸門名不改千秋長藉布衣畱黃河
踞汴城北水高于城築堤三道為護明末賊圍城決水灌之城没于泥沙者半堵城內有良嶽為宋徽宗園林平臺在梁孝王園中東京夢華錄載十樓在汴城內宋盛時最繁華處魏侯生為夷門監至今仍稱舊名

杭州

西子湖開擁翠屏繁華一代小朝廷吳山竟立天
驕馬潮水難邀海若靈堂冷秋風吟蟋蟀陵殘寒
雨泣冬青傷心武穆祠前柏終古無枝向北庭南

稱小朝廷金海陵亮有立馬吳山第一峰之句元師伐宋屯錢塘沙上三日海潮不至賈似道嘗與眾姬妾鬪蟋蟀于半間堂元僧發宋六陵義士收其骨葬之樹冬青以為識

燕京

燕雲十六幽州地淪落烟塵五百年一自朔方成
帝里至今王氣仰中天東南漕轉帆檣遠山海關
懸鎖鑰堅只有黃金臺不見悲歌且向酒家眠燕

十六州自後唐歸于契丹終宋世未入版圖燕京建都始于金迄今不改

蜀都

彈丸割據抗神州鼎足分明讓武侯忼慷出師申
大義扶持正統立千秋五丁力盡功難紀八陣圖
荒蹟尚畱若道劍門天下險興亡何故等蟬蛸三

志帝魏至朱子綱目始以蜀為正統皆由武侯出師二表申明漢賊不兩立之義有以啟之也八陣圖蜀中凡三見皆壘石為之

武昌

碧天無際浪悠悠地接荆吳領上游九派江收湘
漢水幾回人擬帝王州樓空黃鶴誰家笛被擁青
翰何處舟鸚鵡西飛詞客去年年春草怨芳洲

即鄂州楚潛王都此孫權亦曾遷都武昌尋還建業
時民謠有云寧飲建業水不食武昌魚蓋指此事也

臨淄

稱帝稱王奕世雄洋洋大國仰遺風峰巒繚繞長
城險郡邑參差負海同韜畧貽謀竟何有箭韶餘
響亦成空當時十萬臨淄戶祇剩桑田弔雪宮

山東

郡邑皆面山背海山起泰岱東抵海隅綿亘千里上築長城所以備楚也戰國時秦稱西帝齊稱東帝太公兵法有六韜三畧田齊陳氏本虞舜之後

太原

禹蹟堯封紀載微五原邊郡總戎衣解圍難恃劉
琨嘯堅壁還思李牧威晉水清時龍已去汾河秋
到雁常飛武靈兵法開千古騎射休疑變俗非

晉陽

古堯都禹鑿龍門五原皆邊地每多戎患唐高起太原杜詩龍起猶聞
晉水清蓋指此汾水秋雁本李嶠詩古皆車戰至趙武靈王始令民習騎
射舉國以變俗為難後秦制漸廢而騎
兵之法遂千古不易開之者實武靈也

章門

眼底洪都變幾回章江千里抱城來即今烟火仍
新府何處潢池辨劫灰戰血尚翻彭蠡浪陣雲不
散鬱孤臺水邊高閣依然在莫為當時帝子哀

王勃

序洪都新府明太祖與陳友諒大戰鄱湖宸濠之變王陽明起兵贛州嗣是變亂不常屢遭屠僂滕王閣頻燬于火今復建

閩中

無諸舊國背中原阻海依山節制尊跋浪鯨鯢天
可蔽爭林魑魅晝常昏開疆近日過彭島畫地當
時守廈門堪笑蜃樓消滅易空中安擬立乾坤漢封
無諸為閩越王地背中原叛服不常向苦海患常徙瀕海民于內地畫界而守今則海外皆歸版圖彭湖島為臺灣孔道南北各千餘里

嶺南

羊城南望海天垂毒霧炎風氣候移
倒老危亡誰惜宋孤兒蘭香瘴起居民怯
生估客知難恠舟車趨絡繹此鄉寶玉重當時廣州

名五羊城趙佗答文帝書自稱蠻夷大長老夫後因呼為倒老出隋書
蠻傳粵中瘴非一種唯蘭香最毒至則居民伏地避之海中颶風將起先
有雲氣謂之颶母估舶早泊島岸避之颶風者四方之風皆具舟行遇之必敗此鄉多寶玉唐人句

粵西

獐獠雜種俗披猖絕徼虛名隸版章拔地亂峰穿
百粵逆流堵水達三湘蒼梧長恨埋虞舜白雉何
勞貢越裳最苦流官嚴守土北人強半殞南荒粵西
山皆拔地而起舟通湘水有三十六堵逆流而上舜南巡不返葬于蒼梧地多獐獠雜處土司中有土官世守其由銓選者則謂之流官官此地者每苦瘴癘

滇池

碧雞金馬俯滇池頗憶相如建節時禮法難馴人

鳥獸聲靈猶懾漢旌旗山通勾漏收三郡江跨瀾
滄控百夸六詔漫嫌蕃界遠幾番拓地極西陲

雲南

有碧雞金馬二山在滇池上滇池即昆明池漢遣司馬相如諭蜀開西南夸後置交趾九真日南三郡瀾滄江內外皆百夸地馬援舊立銅柱於粵西分蕃漢界其後滇黔一帶累朝開闢郡邑較前界踰遠矣

黔陽

難恠黔陽戰伐多羅施鬼國可如何五溪姓字畱

諸葛九賅功名仰伏波銅鼓浪傳鳴貴竹戈船無

復下牂牁自從鐵索橋成後甲仗騰空萬馬過

貴州

古羅施鬼國諸葛武侯征武陵蠻過五溪九賅皆雜夸種馬援南征皆有舊蹟銅鼓山在貴竹縣有時自鳴漢有戈船將軍由牂牁江下南粵今有鐵索橋為入滇要路

除夕

湖邨臘盡漲江波積雪重陰節序訛也識立春逢

閏早從無雨水隔冬過倚閭目斷飛鴻少爆竹聲

疎鬼嘯多且對兒童開口笑縱憂身世奈渠何

